



The Commonwealth of Massachusetts

DIPARTAMENTU DI SERVISU PÚBLIKU (D.P.U.)

D.P.U. 24-15-A

12 di Seténbru di 2024

Avizu di inkéritu fétu atraves di iniciativa di própi Dipartamentu di Sirvisus Públiku sobri Kustu di Inerjia, ku Fóku na Asésu a inerjia di Kontribuintis Rizidensial.

DISPAXU INTERLOKUTÓRIU SOBRI PRÓSIMUS
PASUS DI INKÉRITU SOBRI ASÉSU A PRESUS DI ENERJIA

I. INTRUDUSON

Na dia 4 di Janéru di 2024, Dipartamentu di Sirvisu Públiku (Dipartamentu) kria un Órdi di Dispaxu ki abri un inkéritu pa analiza kustus ku inerja, fokadu na asesibilidadi a inerja pa kontribuintis rizidensial. Di forma partikular, Dipartamentu sta djobi manera di midjora pulítikas y prugramas di asésu a inerja ki dja izisti, pa garanti un másimu partisipason na kada un di es prugramas y pa difini si otus prugramas podi benefisia inda más kontribuintis rizidensial di enprezas di distribuison di iletrisidadi y gas di kumunidadi.

Na dispaxu, Dipartamentu pidi kumentáriu sobri asuntu rilasionadu ku kriason di prugrama di asésu a inerja rizidensial, prugramas di jeson di pagamentu en atrazu, proteson kontra kórtis di ligason y adimistrason di prugramas di asesibilidadi inerjétiku. Dipartamentu resébi kumentáriu di más di 100 algen envolvidu na asuntu, ki ta inklui públiku en jeral, adivogadu y entidades kontroladu pa Dipartamentu. Es li ta inklui kes sigintis partis envolvidu, ki nu ta ben analiza sê kumentariu más pa frenti: Enpreza di Gas di Boston konxedu pa Redi Nasional, Enpreza di Iletrisidadi di Massachusetts y Enpréza di Iletrisidadi Nantucket, kada un konxedu Redi Nasional (“Redi Nasional”), Enpreza di Iletrisidadi NSTAR konxedu pa Inerja Eversource, Enpreza di Gas NSTAR, y Enpréza di Gas Eversource di Massachusetts, kada un konxedu pa Inerja Eversource (“Eversource”), y Enpréza di Luz Ilétriku y Gas Fitchburg konxedu pa Unitil (“Unitil”), Liberty Utilities (Enpreza di Gas Natural di New England) konxedu pa Liberty (“Liberty”), y Enpréza di Gas Berkshire; (“Berkshire”) (tudu djuntu, “Enprezas di Distribuison”); Prokuradoria Jeral di Kumunidadi (“Prokuradoria-Jeral”); Dipartamentu di Rikursus Inerjétiku (“DOER”); Fundason pa Direitu di Konservason (“CLF”); difensoris di anbenti y di konsumidoris ; Sentru Nasional di Konsumidoris (“NCLC”); Redi di Asésu a Inerja pa Pisoas di Báxu Rendimentu (“LEAN”); Konséliu Amerikanu pa un

Ekonomia di Inerjia Efisénti (“ACEEE”); Konsélu di Inerjia Linpu di Nordesti (“NECEC”);

Konsélu di Planiamentu di ária Metropolitanu (“MAPC”); Vote Solar; Sentru Acadia; Sidadi di Boston; y Cape LightCompact.

Dia 24 di Juliu di 2024, dipos di analiza kumentáriu, Dipartamentu marka un Workshop virtual di un dia interu sobri Kustu di Inerjia (Workshop), ku intérpritis di sás lingua, difôra Ingles, y ku partisipason di sêrka di 100 algen. Atividadis di Workshop komesa ku un ideia jeral sobri kustu inerjétiku fétu pa RMI (antigu Institutu Rocky Mountain) y dipos kontinua ku seson di diskuson di kes sigintis asuntos li: justisa anbental; planus di pagamentu di pursentajen di rendimentu (“PIPPs”);¹ taxa di diskontu diferensiadu (“TDRs”);² diminuison di kustu inerjétiku atraves di kriason di tarifas y prugramas di efisénsia inerjétiku; alkansi y dimografia di klentis; verifikason di inskrison; y un vizon di klentis ku báxu rendimentu sobri verifikason, inskrison y taxas di diskontu.

¹ Di akordu ku PIPP, klentis elijivel ta paga un pursentajen pré-difinidu di rendimentu pa sirvisu di utilidadi públiku, faturas podi ser limitadu a un sértu pursentajen mensal y nivel di prestason podi ser adaptadu pa txiga a un objetivu di asésu difinidu (aprizentason 3, fétu pa NCLC na dia 18 di Junhu di 2024 <https://fileservice.eea.comacloud.net/FileService.Api/file/FileRoom/19232265> (vizitadu pa último bés dia 19 di Agostu di 2024)

² TDRs ta oferesi un konjuntu di taxa di diskontu-elijivel pa rendimentu ki ta bai más direktamenti pa kustus di diferentis grupus di rendimentu, ku taxa di diskontu más altu pa klentis ki sta na parti más báxu di skala di rendimentu y taxas di diskontu más baxu pa klentis na parti más altu di skala di rendimentu (June 17, 2024 aprizentason 5, fétu pa Enprezas di Distribuison na dia 17 di Junhu di 2024 <https://fileservice.eea.comacloud.net/FileService.Api/file/FileRoom/19223735> vizitadu pa último bés dia 19 di Agostu di 2024); aprizentason 24 fétu pa RMI, dia 17 di Junhu di 2024, <https://fileservice.eea.comacloud.net/FileService.Api/file/FileRoom/19223723> vizitadu pa último bés dia 19 di Agostu di 2024)). Kada un di enprezas di distribuison ta da nes mumentu un taxa di diskontu fíkisu pa pisoas di baxu rendimentu, y txeu des sujeri un revizon di kes taxas na últimos anus. D.P.U. 24-15, Votu y Dispaxu na 6.

Ku bazi na kontribuison ki foi resebidu atraves di observasons di Workshop, Dipartamentu disidi ma ten alguns arias di akordu, sima sta indikadu di baxu. Para alen di kela, pa spesifika fóku di es prujetu, Dipartamentu disidi na fazi determinasons preliminar na dós arias spesífikus, a ser fóku di kumentáriu inportanti y di un dibáti más aprofundadu. Mas, pa maioria di asuntus, nu odja ma ten un munti opinion kontrariu y purguntas pendéti txeu dimás pa toma un disizon sen leba en konta otus kontribuison. Di es forma, nu ilabora un konjuntu di purguntas más spesífikus pa nu podi ten kontribuison sobri es asuntus. Na fin di es dispaxu, nu ta da orentason sobri forma di rispondi es purguntas y kumentáriu sobri asuntus en kiston ki foi tratadu li. Tanbé nu ta privé markason di un seson tékiniku pa fasilita diskuson di es asuntus li y kualker otu ki ta ben ser indikadu.

II. ÁRIAS DI KONSÉNSU

Kes sigintis pontus li ta riprizenta arias di konsénsu, baziadu na kumentáriu resebidu

- A. Prugrama di asésu a inerja debi ser fétu di manera ki kustu total di inerja di un rizidénsia ka ser más ki sás pursentu (Kumentáriu di Enprezas di Distribuison na 17, 19,21; Kumentáriu di Pukurador-Jeral na 11; Kumentáriu di NCLC na 5, 9-10; Kumentáriu di Sentru Acadia na 3, 6; Kumentáriu di ACEEE na 1-2).³
- B. Elijibilidadi pa prugramas di asesibilidadi inerjétiku a inerja debi kontinua a ser baziadu tantu na rendimentu komu ka tamanhu di familia, ka só na rendimentu (Kumentáriu di Enprezas di Distribuison na 7, 18; Kumentáriu di Pukurador-Jeral na 5 & n.11, 8, 19; Kumentáriu di LEAN na 8).
- C. Tantu klentis ku akesimêntu y klentis sen akesimêntu débi kontinua ta ser ápitu a resebi prugrama di asésu a inerja (Kumentáriu di Enprezas di Distribuison na 21; Kumentáriu di Pukurador-Jeral na 18-19; Kumentáriu di NCLC na 12; Kumentáriu di LEAN na 9).

³ Dipartamentu ta rikönhési ma kustu total di inerja, independentimenti di konbustivel, ka debi ser más ki sás pursentu, mas Dipartamentu ka ta kontrola pitroliu, propanu ó otus konbustivel di akesimêntu. Nu sta spera kumentáriu ki podi djuda-nu a dizenvolvi pulítikas ki ta benefisia tudu familias di Massachusetts, ka inporta di fóniti di inerja

- D. Klentis en atrazu debi kontinua ta ser ápitú pa prugramas di asésu a inerjia (Kumentáriu di Enprezas di Distribuison na 13; Kumentáriu di Pukurador-Jeral na 8; Kumentáriu di NCL na 6; Kumentáriu di LEAN na 9; CLF Kumentáriu di CLF na at 6; Kumentáriu di Vote Solar na 1; Kumentáriu di Sentru Acadia na 4; Kumentáriu di MAPC na 2).
- E. Asesibilidadi Inerjétiku y sensibilizason debi ten komu fóku, populason inkluidu na Justisa Anbental y familias elijivel atraves di sês rendimentu, ki sta fóra di grupu di populason inkluidu na Justisa Anbêntal (Kumentáriu di Enprezas di Distribuison na 16; Kumentáriu di Pukurador-Jeral na 11, 14; kumentáriu di NCLC na 8-9; Kumentáriu di LEAN na 8-9; Kumentáriu di CLF na 7-9; Kumentáriu di Difensoris Anbental y di Konsumidoris na 4-6; Kumentáriu di Sentru Acadia na 5; Kumentáriu di Cape Light Compact na 9; Kumentáriu di NECEC 3; Kumentáriu di Sidadi Boston na 8).
- F. Para alen di kes atual proteson kontra kórti di inerjia ilétriku durante mézis di invernú, kes proteson li debi ser aumentadu pa épuku di kalor más txeu y pa óra ki sta mau kualidadi di ar. (Kumentáriu di Enprezas di Distribuison na 31; Kumentáriu di Pukurador-Jeral na 25; Kumentáriu di NCLC na 18-21; Kumentáriu di LEAN na 9-10; Kumentáriu di Sidadi di Boston na 5-6; Kumentáriu di NECEC na 3; Kumentáriu di Cape Light Compact na 14-15).⁴

III. PONTUS DI DISIZON

A. TDRs kontra PIPPs

Dipartamentu resébi kumentáriu sobri PIPPs y sobri TDRs. Un muntí algen ki kumenta, mostra ses apoiu a un splorason más forti di PIPPs, pamodi ma es podi garanti un asésu a présu di inerjia justu, baziadu na rendimentu di menbrus di familia (Kumentáriu di Pukurador-Jeral na 1; Kumentáriu di ACEEE na 2; Kumentáriu di Sentru Acadia na 2-3; Kumentáriu di NCLC na 2-3; Kumentáriu di NECEC na 3).⁵ Un muntí algen tanbé rikönhési izistensia di kustus adimistrativu mas altu, preukupason ku privasidadi, y difikuldadi na implimenta PIPPs pamodi nisisidadi di adápita a reduson di rendimentu ifetivu menbrus di familia, y tudu kela podi ser konsideradu un obustákulu na partisipason (Kumentáriu di Pukurador-Jeral na 1;

⁴ Un muntí menbrus di públiku tanbé mostra pozison a favor di proteson kontra kórti durante témpu ki más ta uzadu ar kondisionadu.

⁵ Un muntí algen tanbé aprizenta ses opinion na prifirênsia sobri limitason di faturas a un pursentajen di rendimentu.

Kumentáriu di NCLC na 3; Kumentáriu di CLF na 3-4). Pukurador-Jeral rakumenda pa djunta vantajens di PIPPs y di TDRs atraves di un auméntu di taxa di diskontu fíkisu di bazi na un PIPP, aplikadu di forma automatíku na menbrus di familias ki mostra ser ápitú, ti ki informason nisisariu pa jéri PIPP fika disponivel. (Kumentáriu di Pukurador-Jeral na 2; djobi tanbé Kumentáriu di CLF na 4 (implimentason si un opison di kréditu fíkisu na PIPP na Pennsylvania y New Jersey, ki ta funsiona sima un kréditu fíkisu na fatura)).

Txeu di kes mesmu kumentadoris li fla ma TDR ta serba menus prisíu ki PIPP, mas tanbé ma ta serba más baratu, menus pizadu di pontu di vista administrativu y más fasil di implimenta (Kumentáriu di Pukurador-Jeral na 1-2; Kumentáriu di CLF na 5). Alguns algen fla ma klientis podia ser inskritu di forma automatíku na TDRs sen kustus administrativu ó di implimentason (Kumentáriu di Pukurador-Jeral na 1-2; Kumentáriu di CLF na 5). Enprezas di Distribuison favoresi uzu di TDRs já ki es ta pirmiti más flekisibilidadi y menus kustus di konformidadi y ka ta iziji ki enpreza guarda informason privadu di menbrus di familia (Kumentáriu di Enpreza di Distribuison na 7-9). Enpreza di Distribuison tanbé fla ma, si nivel di rendimentu for aumentadu di forma signifíkativu, difisementi kes pikenus variason di rendimentu di familias ta ben rizulta na un mudansa di nivel di kel familia ó taxa di diskontu asociadu. (Kumentáriu di Enprezas di Distribuison na 9). Alguns kumentáriu ka mostra prifirênsia, es fla ma tudu dós opison devia ser sploradu (Kumentáriu di Cape Light Compact na 5; Kumentáriu di DOER na 7-8; Kumentáriu di MAPC na 3).

Pa konklui, Dipartamentu disidi ma es inkéritu li debi fóka na dizenvolvimêntu di TDRs y non di PIPPs. Prinsipal motivu pa es disizon é fasilita un mudansa di prugrama atual di taxa di diskontu ki ta ben pirmiti-nu trata di asuntus di asésu a inerjia y trazi benefisius di forma klaru pa klientis, más sedu ó más tardi. Ku bazi na atual aplikason di taxas di diskontu pa familias di baxu rendimentu, TDRs podi ser implimentadu di manera más fasil ku kustu

administrativu y gastus di partisipason un póku más baxu ki di PIPPs. Tanbé nu persebi ma TDR implimentadu na New Hampshire, ki tanbé foi sploradu na prusésu di taxa báziku, aktualmenti pendéti di Redi Nasional pa si enprezas di distribuison di inerja, D.P.U. 23-150, podi ser konsideradu un izenplu instrutivu pa es invistigason. Nu disidi inda ma nu debi djobi un kuadru di TDR ki ten komu objetivu ditermina sértus nivel di gastus inerjétiku rizidensial pa klentis di iletrisidadi y gas, ku pusivel variason di akordu ku konbustivel di akesimentu primariu.

Dipos di disidi fóka nos invistigason na TDR's orientadu pa gastus inerjétiku, nu aprizenta txeu purguntas y problemas pa fazi un análisis más aprofundadu, ki ta inklui asuntos rilasionadu ku diterminason di nivel adikuadu di kustu inerjétiku y tanbé frikuensia di fazi revizon di nivel di diskontu pa un pusivel ajustamentu. Kes preukupason sta listadu di baxu na Sesón IV.B.

B. Rakuperason di Kéda na Riseitas

Dipartamentu djobi atxa informason sobri modi ki kéda di riseitas sta rilasionadu ku prugrama di asesibilidadi inerjétiku podi ser rakuperadu. Rakuperason di diskóntus y kustus adisional rilasionadu ku prugrama di jeston di atrazus (“AMPs”) sta kontisi nes mumentu atraves di ajustamentu di asistensia rizidensial (“RAAF”) na tudu nivel di tarifas dentu di respetivu aria di sirvisu di kada enpreza. Redi Nasional y Eversource ta prifiri manti RAAF só dentu di ses tiritóriu di sirvisu, pa ki ses klentis ka subisídia klentis fóra di ses tiritóriu di sirvisu.

(Kumentáriu di Enprezas di Distribuison na 20). Berkshire, Liberty, y Unitil sta apoia un abordajen di rakuperason di kustu a nivel di stadu pamodi ta sirvi un númeru di klentis rilativamenti poku (prinsipalmenti klentis rizidensial), ses arias di sirvisu ta inklui un númeru rilativamenti grandi di populason di Justisa Anbêntal, klentis di baxu rendimentu, y rizidensias ki ten kustus inerjétiku más altu di ki otus lugaris na Kumunidadi (Kumentáriu di Enprezas di

Distribuisson na 20). Des forma, Berkshire, Liberty, y Unitil fla ma partilia di kustus di prugramas di asesibilidadi inerjétiku na stadu intêru podi ser un abordajen ekuitativu na rakuperason di reseitas. (Kumentáriu di Enprezas di Distribuisson na 20-21). Pukurador-Jeral & Cape Light Compact tanbé sujeri pa splóra rakuperason di kustus a nivel di stadu (Kumentáriu di Pukurador-Jeral na 18; Kumentáriu di Cape Light Compact na 10).

Alguns kumentadoris rakumenda ki klentis ku tarefas di diskontu debi ser dispensadu di paga kustu di konseson di rakuperason di diskontu atraves di RAAF (Kumentáriu di NCLC na 6-7; Kumentáriu di Cape Light Compact na 10). Otus kumentadoris rakumenda un invistigason mas aprofundadu sobri kubertura di kustus atraves di subsidiu di kontribuintis, finansiamentu di stadu ó federal, y kontribuisson di asionistas (Kumentáriu di Pukurador-Jeral na 18; Kumentariu di Acadia Center na 5; Kumentáriu di NCLC na 25; Kumentáriu di Cape Light Compact na 10; Kumentáriu di Vote Solar na 2-3).

Di forma jeral, Dipartamentu disidi ma rakuperason di keda di riseitas di atribuisson di diskontu debi kontinua a ser kontadu atraves di enprezas spesífikus di RAAFs na tudu tipus di klentis. Mas, Dipartamentu mostra txeu asuntus pa splóra mudansas na atual strutura di rakuperason, sima kiston di sabi si rakuperason debi ser fetu a nivel di stadu, si debi ser ten kontribuisson di asionistas, y si finansiamentu di stadu ó federal podi ser un potensial fóni di kontribuisson. Tanbé nu nota ma Lei Governamental (G.L). c. 164, § 1F(4)(i) ta privé ki “kustu di kes diskontu li debi ser inkluidu na taxas kobrau pa tudu otus klentis di un enpreza di distribuisson”, u ki ta labanta kiston di sabi si kes algen ki ta resébi un taxa di diskontu debi paga es keda di riseitas. Otus kiston rilasionadu ku rakuperason di keda di riseitas sta listadu na Sesón IV.C.

IV. ARIAS PA MÁŠ INVISTIGASON/KISTONS BÁZIKU PA TRATA DI ASUNTU DIFINIDUS DI FORMA INKONPLETU

A. Intruduson

Para alen di arias di konsénsu y di pontus di disizon mensionadu di riba, Dipartamentu identifika kistons ki ta justifika un invistigason más profundu y kumentáriu di partis interesadu. Pur isu, Dipartamentu pidi partis interesadu pa kumenta kualker un di kes sigintis asuntu. Dipartamentu ta insentiva partis interesadu a da informason óra ki sta disponivel y pa identifika inpidimentus regulamentar ó statuarius rifiréti a pulítikas prifiridu óra ki é nisisariu.

B. Ditalis di TDR ku fóku na kustu inerjétiku

1. Kal ki é nivel alvu di kustu inerjétiku total di familias baxu di sás pursentu, TDR debi ser prujetadu pa da un benefisiu a un altu númeru di klentis? Modi ki objetivu di kustu inerjétiku debi ser partiliadu pa kustu di gas kontra kustu ilétriku? Modi ki debi ser divididu kustus di kaza ku akesimentu kontra kustus di kaza sen akesimentu?
2. Kal ki é vantajens y disvantajen di uza pursentajen di aria di riseita média (“AMI”) kontra pursentajen di renda média di stadu (“SMI”) pa determina elijibilidadi y nivel?
3. Ku ki frikuensia, un strutura kriadu pa TDR debi ser analizadu y mudadu pa garanti alinhamentu ku mudansas na présu di inerja, inflason, tendénsia di uzu, y otu kuzas du tipu?
4. Taxa di diskontu debi varia di akordu ku uzu?
5. Taxa di diskontu debi varia ku bazi na resebimentu di otus benefisius similhianti?
6. Nivel di diskontu debi ser integradu na kriason di TDR?

C. Rakuperason di keda di riseitas pamodi taxas di diskontu

1. Si y modi ki klentis ku taxa di diskontu debi ser iskluidu di paga taxa di keda di riseitas (pur izenplu: dispensadu di paga RAAF)?
2. Rakuperason debi ser a nivel di stadu (ku rakuperason siparadu para gas kontra iletrisidadi) envés di na tudu konsesionaria?

3. Si y modi ki asionistas debi kontribui pa rakupera keda di riseitas? Asionistas ta benefisia di disponibilitadi di taxas di diskontu más abranjenti?
4. Kal ki é vantajens y disvantajen di uza ôtu fôntis di finansiamentu, sima fideral ó stadual, pa rakupera keda di riseitas? Ki otu fundus federal ó stadual ki dja é karatirizadu komu un ajuda na kustus inerjétiku? Si aplikadu fundus federal ó stadual pa kompensa keda di riseitas, modi ki kes fundus li debi ser integradu na formula di RAAF?

D. AMPs

1. Tudu enpreza di distribuison debi strutura ses AMPs na mesmu forma? Tudu es debi uza formula padron pa nivel di perdon di dívida ki ta dadu tudu anu pa kontribuintis elijivel?
2. AMPs debi ser oferesidu a klentis ku rendimentu entri 60 y 80 pursentu AMI/SMI?

E. Kórti di ligason pa falta di pagamentu

1. Kórti di ligason pa falta di pagamentu debi ser proibidu, independentimenti di data ó épuku di anu?
2. Debi tra taxas di kórti di ligason pa klentis ki sta benefisia di diskontu? Kal ki é kustu di eliminason di taxas di re-ligason pa klentis ku diskontu?
3. Taxa di re-ligason debi tradu di tudu klentis?⁶ Kal ki é kustu di eliminason di taxas di re-ligason?
4. Pur favor, diskuti sobri vantajens y disvantajens di implimentason di suspenson di kórti di inerjia ilétriku durante tudu piriudu di veron, en konparason ku un suspenson di kórti di inerjia só óra ki kalor sta más txeu ó óra ki sta mau kualidadi di ar. Komu parti di es risposta, pur favor kumenta sobri kualker inpákito a nivel di stadu ó regulamentar di mudansa na un suspenson di kórti di ilétriku durante mézis di veron ó piriudu ku txeu kalor ó di mau kualidadi di ar.

⁶ Enprezas di Distribuison ka ta kobra taxa di disligamentu (Kumentariu di Enprezas di Distribuison na 30).

F. Inskrison y verifikason

1. En rilason Enprezas di Distribuison, pur favor splika prusésu atual ki kada enpreza ta inskrévi klentis ku tarifas di diskontu di forma automátiku.
2. En rilason Enprezas di Distribuison, pur favor splika prusésu atual ki kada enpreza ta inskrévi klentis ku tarifas di diskontu atraves di otus meius ki ka é automátiku.
3. Ku ki frikuensia y atraves di ki prusésu ki klentis debi torna verefika ses elijibilidadi.
4. Si y modi ki ajénsias di ason kumunitariu (“CAAs”), organizason di bazi kumunitariu (“CBOs”), y ajénsias di stadu debi ser uzadu pa fasilita inskrison automátiku ó nau, y verifikason ó re-verefikason.
5. Si y modi ki ajénsias di stadu podi kria un “balkon úniku” pa inskrison, verefikason y re-verefikason na tudu prugramas di asistensia stadual, inkluidu AMPs, taxas di diskontu, y aliviu di fin di sirvisu?
6. Pur favor, splika si ten un grupu spesífiku di familias ó klentis ki sta ápitú a resebi tarifas di diskontu, mas ki ka sta resebi, y splika bazi pa es disizon. Da dadu y análisi di apôiu ó splika análisi fetu pa toma es disizon.
7. Ki grupu di klentis ápitú ki é difisel di inskrévi y pamodi?
8. Si y modi ki ta stabilisidu prusésu du autu-verefikason?
9. Pa Redi Nasional y pa Opower, splika prujetu sprimental pa aumenta inskrison na prugramas di asistensia finanséru (ki komesa na veron di 2023) y da informason rizultantis y splikason rizumidu di es informason.

G. Divulgason

1. Atraves di ki métodus, Enprezas di Distribuison debi aumenta isforsu di sensibilizason pa informa klentis di ki familias ki sta entri 200 pursentu di nivel federal di próbreza y 60 pursentu di SMI, sta ápitú pa resebi taxas di diskontu?
2. Si y modi ki fóká sensibilizason pa klentis na arias ku más kazus di kórti y más klentis ku fatura en atrazu ó na AMPs, para alen di diresiona pa populason di Justisa Anbêntal y otus dimográfikus?

3. Si y modi ki CAAs y CBOs podi ser uzadu pa fasilita divulgason?

V. PIDIDU DI KUMENTARIU

Dipartamentu sta pidi kumentáriu pur skritu sobri kualker un ó tudu problemas y asuntos ki foi tratadu li ti **5:00 di Tardi, di Sésta Fera, 1 di Nuvenbru di 2024**. Nu ta insentiva pisoas interesadu a aprizenta ses pozison konsensual y manda djuntu ku kumentariu, senpri ki for pusivel. Tudu kumentariu debi ser mandadu pa Dipartamentu na formatu iletróniku, anekisadu na e-mail dpu.efiling@mass.gov y laurie.e.weisman@mass.gov. Téstu di e-mail debi spesifika: (1) númeru di rejistu di prusésu (D.P.U. 24-15); (2) nomi di algen ó entidadi ki sta aprizenta si observason; y (3) ma dukumentu é un kumentariu skritu. Téstu iletróniku tanbé debi teni nomi, título y númeru di tilifoni di algen ki debi ser kontakitadu na kazu di dúvida sobri aprizentason. Tudu dukumentu aprizentadu na formatu iletróniku ta ben ser publikadu na pájina di internet di Dipartamentu, basta djobi dukumentus pa si númeru na bazi di dadus di dukumentus na <https://eeaonline.eea.state.ma.us/DPU/Fileroom/>.

VI. DISPAXU

Pur konsiginti, dipos di notifikason, kumentáriu y divídu konsiderason, é:

DISPAXADU: Ki Dipartamentu manda un kópia di es dispaxu pa tudu algen ki sta ba lista di distribuison di es prusésu; y é

AINDA DISPAXADU: Ki kumentáriu pur skritu debi ser mandadu ti dia 1 di Nuvenbru di 2024.

Pa dispaxu di Dipartamentu,

[Asinatura]

James M. Van Nostrand, Prizidénti

[Asinatura]

Cecile M. Fraser, Kumisária

[Asinatura]

Staci Rubin, Kumisária